

Enyaarubha ya Pauro ku Bhafiripi Obhutaangiro

Enyaarubha yino yakaamirwe na Pauro, omuhokya wa Taatabhugya, akakaamira ekanisa yino eri mumugye gwa Firipi. Erarorekana kubha Pauro akakaama enyaarubha yino hano yaari mukibhoho mumugye gwa Rooma. Pauro akabhakaamira Abhakrisito bhano bhaari bhamwiikiriirye Krisito Yeesu. Hano Pauro yahikiri kweebho, akabharwaazira Amang’ana Amazomu. Ibhaga riindi Abhakrisito bhayo nibho bhakeereky obhuseegi ku Pauro no okumusakirya kumeendi gaaye.

Obhugirirye bhwa Pauro okubhakaamira enyaarubha yino yaari arabhabhuurira, “Muzomirye Abhafiripi,” kubhusakirya bhuno bhakaruusya kweewe okuhitira ku Epafurodito. Kweeki, akeenda kubheerekeererya amang’ana go okukora no okubhatoongera amanaga okubha bhabhe bharatuniirira ekireengyo kya Yeesu Krisito kwo okwiikong’eererya. Eriing’ana eriindi rino yeendiri kubhabhuurira ryaari okubhareky bhatiikirirya ameeogyo mabhiihu ga Abhayahudi gano gaabhakoriri okutaamania na abhiikirirya mukanisa yaabhu.

Enyaarubha yino emenyekeeni kubha ni nyaarubha yo obhuzomererwa kwo okubha muusi wamu eriiseego ryo obhuzomererwa ririikyoorera maanga maaru. Obhuzomererwa

bhuyo bhugumire kubhiikirirya bha Krisito Yeesu.

Obhukeerya

¹ Enyaarubha yino nikaamiri enye Pauro, hamwe na Timoteo, omugya omurikyaane wa Krisito Yeesu. Turabhakaamira abhiimeerereri na abhasakirya bhe ekanisa, na neemwe abhahoreeru* abhaandi bhoosi kwo okugwaatana na Krisito Yeesu, bhano mukwiikara mumugye gwa Firipi.

² Orubhaango no omureembe okurwa ku Taatabhugya Taata weetu, na ku Mukuru weetu Yeesu Krisito, bhibhe neemwe.

Pauro arabhasabhira Abhafiripi

³ Eriibhaga ryoosi hano nikubhahiita emwe, niramubhuurira Taatabhugya, “Ozomirye, Omukuru waane.”

⁴ Kweeki, eriibhaga ryoosi hano nikubhasabhira, nirabhasabhira kwo obhuzomererwa,

⁵ kwo okubha emwe mugwaateeni neenye okuraarika Amang’ana Amazomu, kweema orusiku runo mukiigwa no okwiikirirya tee reero.

⁶ Nino obhuheene kubha Taatabhugya wuno yataangiri emirimo emizomu muziikoro zyeenyu, aragigeendererya tee gikuunaane kwo orusiku runo Krisito Yeesu araakyoore.

⁷ Ni bhuzomu niiseege gano iguru weenyu mwoosi, kwo okubha nibhaseegiri bhukong’u.

* **1:1 Abhahoreeru.** Rora eng’ana yino mu Bhugaruri bhwa Amang’ana Amakong’u.

Muragwaatana murubhaango rwa Taatabhugya hamwe neenye, eraabhe nibhohirwe mukibhoho kisyera abhe niriisasaama no okumenyeekererya Amang'ana Amazomu.

⁸ Taatabhugya amenyiri kubha niragaamba obhuheene, hano nikukumiirirya kubha niriigoomba bhukong'u okurorena neemwe kweeki. Nibhaseegiri emwe kwo obhuseegi bhuryabhurya, kyeego Krisito Yeesu abhaseegiri.

⁹ Nirabhasabhira ku Taatabhugya kubha obhuseegi bhweenyu bhugeenderere kwaruha bhukong'u, kweeki mubhe na amang'eeni no obhumenyeekererya,

¹⁰ okubha mubhone okugiikirirya gano gano obhweera. Hayo niho murabha abhaheene, murabha mutana amasoro tee orusiku rurya Krisito araakyoore.

¹¹ Obhwiikari bhweenyu bhuriizura amang'ana ge eheene, gano gakubhoneka kuhitira Krisito Yeesu. Gayo goosi gamuguungye no okumukumya Taatabhugya.

Okwiikara ni kumuhokeerya Krisito

¹² Ambe, abhahiiri bhaane, ndeenda mumenye bhuzomu kubha gano gaambweeni, gasakiirye bhukong'u kuraarika Amang'ana Amazomu.

¹³ Kweego, abhariibhi bhoosi bhe enyuumba yo obhutemi, hamwe na abhaandi bhoosi, bhamenyiri kubha nibhohirwe kwo okubha niramuhokeerya Krisito.

¹⁴ Hamwe na gayo, nimenyiri kubha okubhohwa kwaane eno, kubhakoriri abhiikirirya abharikyeetu bhaaru bhagumire

eziikoro ku Mukuru Yeesu, naabhe
bharabharwaazira abhaatu eng'ana ya
Taatabhugya kwa amanaga goosi, bhatana haho.

¹⁵ Ni heene kubha, bhariho abhaandi bhano
bhakurwaaza amang'ana ga Krisito kwo okubha
bhano omugono na bharahizana neenye.
Naabhe ego, bhariho abhaandi bhano
bhakurwaaza kumiiseego amazomu.

¹⁶ Bhano bhakukora ego kwo obhuseegi, eno
bhamenyiri bhuzomu kubha Taatabhugya
anituuriri mukibhoho okubha nimeererere
Amang'ana Amazomu.

¹⁷ Nawe bharya bho obhwiimani, bhararwaaza
amang'ana ga Krisito kwe enzira yo okuhizana
neenye, naabhe etari kwe egoro nzomu.
Bhareenda kwoongerya enyaako yaane
mukibhoho.

¹⁸ Nawe garasarikaki? Amang'ana ga Krisito
gakurwaazwa, gabhe kumiiseego amabhi kasi
kumiiseego mazomu. Neenye kwe ekigirirye kye
eriing'ana riyo nirazomererwa. Kweeki,
nirageenderera kubha no obhuzomererwa.

¹⁹ Nimenyiri kubha mugoosi gano gambweeni,
niratuuribhwa, kwo okubha muranisabhira ku
Taatabhugya, ne Egoro Muhoreeru† wa Yeesu
Krisito aranisakirya.

²⁰ Niraganya kwe enaamba kuru no okwiisiga
kubha, nitakusuukibhwa kwe enzira yoyoosi.
Nawe kwo obhukaari bhwoosi, kyeego eziisiku
zyoosi na bhoono egoego, Krisito aguungibhwe

† **1:19 Egoro Muhoreeru.** Rora amang'ana gano mu Bhugaruri
bhwa Amang'ana Amakong'u.

mugoosi gano nikukora, hano nikubha muhoru kasi nikuuri.

²¹ Kweenye hano niraasaage muhoru nikumuhokeerya Krisito, na hano niraakwe, nirabha no obhweera bhukong'u.

²² Nawe niraageenderere kwiikara mukyaaro, nirageenderera kurora obhweera bhwe emirimo gino nikukora. Bhoono nisore rihe? Enye nitamenyiri!

²³ Nirarutwa gati wa amang'ana abhiri. Niriigoomba okurwa mukyaaro hano, ndeenda niikare hamwe na Krisito. Rino niryo rino obhweera bhukong'u.

²⁴ Nawe ereenderwa kukiraho, enye nigeenderere kwiikara mukyaaro kwiiguru weenyu.

²⁵ Nino obhuheene bhwe eng'ana yiyo, kweego nimenyiri kubha nirageenderera kwiikara mukyaaro. Kweeki, nirabha hamwe neemwe mwoosi, okubha nibhasakirye mukiine mubhwiikirirya bhweenyu no okubha no obhuzomererwa.

²⁶ Hano niraabhe hamwe neemwe, murabha ne ekigirirye kyo okurora enguungo iguru waane kwo okugwaatana na Krisito Yeesu, kwo okubha arabha anisakiirye nikyoore kweemwe.

Eteemo yeenyu etuniirire Amang'ana Amazomu

²⁷ Ambe, eng'ana yino ekweenderwa ni kubha eteemwa yeenyu eriing'aane na Amang'ana Amazomu iguru wa Krisito. Hano nikuuza kubharora kisy niritama kuuza, niigwe murageenderera kwiimeerera bhugumiru no okubha no obhumwe, kwe ekoro yimwe eno

murarwaana eriihi ryo obhwiikirirya bhuno bhukutuukana na Amang'ana Amazomu.

²⁸ Mutabhoobhoha abhabhisa bheenyu kwe eng'ana yoyoosi. Yiyo niyo eraabheerekye kubha ebho bhareerekera kusikibhwa, nawe emwe mureerekera kutuuribhwa. Gayo goosi ni mirimo gya Taatabhugya.

²⁹ Mutaheerwe okumwiikirirya Krisito omweene, nawe muheerwe naabhe okunyaakibhwa kwiiguru waaye.

³⁰ Muriitana eriihi riryarirya, rino niteeni naryo, kyeego mwaruuzi. Naabhe bhoono muriigwa kubha nirageenderera kwiitana naryo.

2

Okweega obhusuuku bhwa Yeesu Krisito

¹ Awe, muratoongerwa egoro kuriing'aana no okubha abhaatu bha Krisito? Awe, muragosororibhwa no obhuseegi bhwaaye? Mbe, munabhwo obhugwaatani ne Egoro Muhoreeru? Mbe, muraseegwa no okurorerwa ebhigoongi na Krisito?

² Eraabhe niigo eri, niho mukuunaanie obhuzomererwa bhwaane kwo okubha no obhwiigwaani no obhuseegi emwe kwe emwe. Kweeki, mubhe no obhumwe muziikoro zyeenyu na mubhe na amiiseego gamwe.

³ Mutakora eriiing'ana ryoryoosi kwe egoro yo obhwiimani naabhe kwo obhwiizuungya. Nawe mubhe no obhusuuku no okubhara abhaandi kubha bhazomu kukira emwe abheene.

⁴ Omuutu atiiseega amang'ana gaaye omweene ego, nawe kweeki yiiseege amang'ana ga abhaandi.

⁵ Amiiseego geenyu gabhe garyagarya gano yaari nago Krisito Yeesu.

⁶ Yiingabha ewe kwe esimuka yaari Taatabhugya, ataruuzi ni kisi asaage agwaatiriiri riyo.

⁷ Nawe, ewe akaritiga riyo, akiyiikya, akabha kyeego omugya, akiibhurwa mutuubho yo omuutu, akabha omuutu.

⁸ Neewe akabha ne etuubho yo omuutu, akiyiikya, akabha omwiigwa ku Taatabhugya, akiikirirya okukwa,

naabhe kukwa kumusaraba!

⁹ Kweego Taatabhugya akamutiirya iguru kukira ebhigiro bhyoosi, akamuha eriina eriikuru kukira amariina goosi,

¹⁰ okubha kwo obhusuuku bhwe eriina rya Yeesu,

ebhigiro bhyoosi bhigame kweewe,

bhya mwiisaaro,

bhya mukyaaro

na bhya nyaari.*

¹¹ Kweeki, abhaatu bhoosi bhiikirirye kubha Yeesu Krisito ni Mukuru, kwo obhuguungo bhwa Taatabhugya Taata.

Abhiikirirya bhabhe kyeego obhweero mukyaaro

¹² Awee, abhasegwa bhaane, eriibhaga hano niari kweemwe, mwaari muramwiigwa

* **2:10 Nyaari.** Rora eng'ana yino mu Bhugaruri bhwa Amang'ana Amakong'u.

Taatabhugya eziisiku zyoosi. Kweego ego, naabhe bhoono hano niri kure neemwe mugeenderere kukora gano gakweenderwa kubhaatu bhano Taatabhugya abhatuurirye. Mukore gayo kwo okurigita kuno kukutuukana no okumwoobhoha Taatabhugya.

¹³ Ambe, mukore ego kwo okubha Taatabhugya niwe akukora emirimo muusi weenyu, okubha museege no okukora amang'ana gano akuseega gakorwe.

¹⁴ Amang'ana goosi gano mukukora, mukore kutama kuririirira naabhe kuhakana.

¹⁵ Kweego, mubhe abhaana bha Taatabhugya abhaheene bhano bhatari na amasoro. Kweeki, mubhe abhaatu bhano bhatakugaambwa bhubhi gati wa abhaatu bha bhoono bhano bhiizwiiri amabhi na bhano bhabhuriri. Gati wa abhaatu bhayo, emwe murerekane kyo obhweero bhuno bhukubhara mukyaaro.

¹⁶ Kweeki, mubharwaazire abhaatu bhagumire mung'ana ya Taatabhugya yino ekubhaha obhuhoru bhwa kirakeego. Mukore ego okubha niizuungye murusiku runo Krisito araakyoore, kubha emirimo gino nikakora kwo omukya gati weenyu gitaari gya bhusa.

¹⁷ Naabhe eraabhe obhuhoru bhwaane bhuraruusibhwa kye ekimweeso kya amaanzi go omuzabibu, hamwe no obhwiikirirya bhweenyu bhuno mukukora ekimweeso embere wa Taatabhugya, enye nirazomererwa. Obhuzomererwa bhuyo bhuragwaatana hamwe na neemwe mwoosi.

¹⁸ Na neemwe muzomererwe egoego, kweeki muriiryaate hamwe neenye.

Pauro arabhatuma Timoteo na Epafurodito

¹⁹ Omukuru Yeesu ariiseega, nine eriisigo kumuragania Timoteo hano haguhiigo, yiize kweemwe, okubha araakyoore eno, anitoongere ekoro hano akunibhuurira amang'ana geenyu.

²⁰ Kwo okubha nitana muutu wuundi wuno akubhamenya emwe heene heene kya Timoteo.

²¹ Abhaandi bhoosi bharamenya amang'ana gaabhu abheene, bhatakumenya amang'ana ga Krisito Yeesu.

²² Nawe mumenyiri kyeego Timoteo yiiyeerekirye kubha muutu muzomu. Ahokirye neenye mumirimo gyo okurwaaza Amang'ana Amazomu, kyeego omwaana na wiise waabhu.

²³ Kweego niriisiga kubha, niramuragania kweemwe okutama kukeezera bhwaangu hano niraamenye amang'ana gano garaanibhone.

²⁴ Kweeki, niriisiga kubha Omukuru Yeesu aranikiririya enye niize kweemwe haguhiigo.

²⁵ Bhoono nirarora bhuzomu okumuragania kweemwe omwiikirirya omurikyaane Epafurodito, wuno akukora emirimo gya Taatabhugya hamwe neenye. Niwe omusirikare omurikyaane mwiihi ryo okwiitanira Amang'ana Amazomu. Kweeki, niwe mukumuragania kweenye okunisakirya no okunihokeerya mubhigiro bhino nikusuuhirwa.

²⁶ Niramuhaatira kwo okubha ewe ariigoomba kurorana neemwe mwoosi, kweeki, ekoro yaaye ene ebhigoongi kwo okubha mwiigwiiri yaari murweeri.

²⁷ Eheene yaari murweeri bhukong'u, wo okukwa. Bhoono Taatabhugya akamurorera

ebhigoongi, akamuhorya. Etaari kubha Taatabhugya yaari ne ebhigoongi kweewe omweene, nawe yaari ne ebhigoongi naabhe kweenye, okubha ebhigoongi bhyaane bhitiyoongerya iguru ye ebhigoongi ebhiindi.

²⁸ Kwe ekigirirye kiyo, niramuragania kweemwe kwa bhwaangu, okubha hano mukumurora kweeki, muzomererwe ne ehaho yaane ehwe.

²⁹ Mumusuung'aane kwo obhuseegi bhwo Omukuru Yeesu na kwo obhuzomererwa bhwoosi. Omuutu wowoosi kya wuyo, mumusuuke,

³⁰ kwo okubha yaari haguhi kukwa kwiiguru ye emirimo gya Krisito. Kweeki, yaari abhanwiiri okubhurya obhwiikari bhwaaye, okubha ahikye obhusakirya bhuno emwe mukatamwa okubhuhikya kweenye kwo okubha niari kure neemwe.

3

Pauro aramwiisiga Krisito

¹ Mubhuteero, abhahiiri bhaane, muzomererwe kwo okugwaatana no Omukuru Yeesu. Amang'ana gano naamariri kubhakaamira, nitakurosa kukyoorera kubhakaamira, kwo okubha gayo ni kye engubha yeenyu yo obhwiikirirya.

² Mwiiriihe na abheegya bho orurimi bhano bhakusikirya emigiro gye Ekiyahudi mukanisa. Abheegya bhayo ni kye eziimbwa, ni bhano bhakutemya obhubhi, bharakumiirirya kubha otinwe niho otuuribhwe.

³ Rora etwe nibho tusaarirwe kwe eheene na Taatabhugya, kwo okubha Ekoru Muhoreeru atusakiirye okumuseengera Taatabhugya. Etwe turiikumya iguru wa Krisito Yeesu no okumwiisiga. Kweeki, etwe tutakwiisiga amahokya geetu ge emibhiri okubhona obhutuurya,

⁴ yiingabha enye omweene niinganagirye okwiisiga amang'ana go omubhiri. Eraabhe ariho omuutu wuno ariirora anago amahokya go omubhiri gano akunagya okwiisiga, enye ninago maaru go okwiisiga kukira ewe.

⁵ Enye nikasaarwa orusiku rwa kanaane okurwa okwiibhurwa,* nikarwa mukisyooko kya Benjamini, we ekyaaro kya Iziraeri. Enye ni Mweeburania eheene. Kwo okugigwaata emigiro gye Ekiyahudi, enye nikagigwaata bhuzomu, kwo okubha niari Mufarisayo.†

⁶ Kweeki, nikiigoomba bhukong'u kukora gano nikiiseega kubha niigo Taatabhugya akweenda. Kiyi nikiyo kyagirirye nikabhanyaakya Abhakrisito. Kwe eheene yino ekutuukana ne emigiro, niari nitana amasoro gogoosi.

⁷ Nawe, gayo goosi gano niari kurora kubha gano obhweera, bhoono nirarora gatana bhweera kwo okumutuniirira Krisito.

⁸ Naabhe gatari gayo ageene, nawe nirarora goosi kubha gatana bhweera okuriing'ania no obhweera obhukuru bhwo okumumenya Krisito Yeesu, Omukuru waane. Kwiiguru waaye, nitigiri

* **3:5** Rora Obhweemero 17:12; Abharaawi 12:3. † **3:5 Mufarisayo.** Rora *Abhafarisayo* mu Bhugaruri bhwa Amang'ana Amakong'u.

agaandi goosi. Nirabhara gayo kyo obhunyaka, okubha nibhe omuutu wa Krisito,

⁹ na nigwaatane neewe. Nitakwiisigira kweeki, eheene yino ekurwa kwo okwiigwa emigiro, nawe eheene yirya yino ekurwa kwo okumwiikirirya Krisito. Eheene yiyo, erahaanwa na Taatabhugya kubhano bhamwiikiriirye Krisito.

¹⁰ Ndeenda okumumenya Krisito kukiraho no okubha na amanaga gano gaamuryooriri Krisito kurwa mubhaku. Ndeenda obhugwaatani neewe munyaako yaaye no okutuubhana neewe muruku rwaaye.

¹¹ Ndeenda amang'ana gayo okubha nibhe gati wa abhaatu bhano Taatabhugya araabharyoore okurwa mubhaku.

Okwiikong'eererya tee mubhuteero bhwe emirimo

¹² Enye nitakugaamba nimariri kuhikira obhuteero bhwa amang'ana gayo goosi, kasi nimariri kubha omuheene, zeyi, nawe nirageenderera kwo omukya okubha nibhone gayo. Gayo nigo Krisito Yeesu akaanibhirikirira nibhone.

¹³ Abhahiiri bhaane, nitakwiibhara kubha nimariri okugwaata gayo. Nawe nirakora ekigiro kimwe, nitigiri okwiiseega gano gahitiri na nirakora omukya okubha nibhone gano gari embere.

¹⁴ Nirageenderera kwo omukya okubha nihike mubhuteero no okuhaanwa esaambo yaane. Esaambo yiyo niyo embirikiro ya Taatabhugya kusikira mwiisaaro kwo okuhitira Krisito Yeesu.

¹⁵ Kweego, etwe twoosi bhano tukong'iri mukoro, tureenderwa kubha no obhukong'eru bhuyobhuyo. Kyeego muna amiiseegi gano gatatuubheeni na amang'ana gano, Taatabhugya niwe arabhakuundukurira okubha mugamenye kyeego gari.

¹⁶ Bhoono ekigiro ekikuru ni kubha tugye embere kwe enzira yiyoyiyo yino tuyiituniiriiri tee bhoono ego.

Abhiikirirya bheege eteemwa ya Pauro

¹⁷ Abhahiiri bhaane, mwoosi mweege eteemo yaane. Kweeki, mweege kubhaatu bhano bhakutuniirira eteemwa yeetu.

¹⁸ Nimariri kubhabhuurira maanga nzaru eriing'ana rino nikweenda kugaamba, bhoono nirarikyoorera kweeki naabhe kwe eziingusuri, bhariho abhaatu bhaaru kuteemo yaabhu bhariikara kya abhabhisa bho omusaraba gwa Krisito.

¹⁹ Obhuteero bhwa abhaatu bhayo ni bhusikibhwa, enaamba yaabhu niyo Taatabhugya waabhu. Ebho bhariikumirya amahokya ge eziisoni gano bhakukora. Kweeki, bharakorera amang'ana ge ekyaaro ageene.

²⁰ Nawe, etwe ni bhiikari bha mwiisaaro na turaroreerera kwe enaamba ekuru yo okurwa eyo kwo Omutuurya, Omukuru Yeesu Krisito.

²¹ Ewe anazyo eziinguru zyo okutuura ebhigiro bhyoosi bhibhe iyaasi wo obhukaangati bhwaaye. Kwe enzira ya amanaga gayo, arakyoosya emibhiri gyeetu gyo okunyoheera, gibhe no obhuguungo kyeego omubhiri gwaaye.

4

¹ Kweego, abhahiiri bhaane, mwiimeerere bhugumiru kwo okumwiisiga Omukuru. Nibhaseegiri na niriigoomba okurorana neemwe, abharikyaane. Emwe ni bhuzomererwa bhwaane na ni saambo yaane yino niheerwe kwe emirimo gino nikoriri.

Obhurekya bhwa Pauro

² Nirabhiisasaama bhukong'u Euodia na Sintike bhabhe na amiiseego gamwe, kwo okubha bhoosi bharamutuniirira Omukuru Yeesu.

³ Naabhe awe omuhokya omurikyaane omuheene, nirasabha obhasakiryе abhakari abhabhiri bhayo bhabhe na amiiseego gamwe. Bhayo bhoosi bhabhiri bhakakora omukya bhukong'u hamwe neenye kwo okuraarika Amang'ana Amazomu iguru wa Krisito Yeesu. Kweeki, abhakari bhayo bhaari bharakora emirimo hamwe na Kirementi na abhahokya abharikyaane abhaandi. Amariina ga abhaatu bhayo bhoosi gakaamirwe mukitabhu kyo obhuhoru.

⁴ Muzomererwe eziisiku zyoosi, kwo okugwaatana no Omukuru Yeesu, nirabhuga kweeki, muzomererwe!

⁵ Obhunyoohu bhweenyu bhumenyekane kubhaatu bhoosi. Omukuru Yeesu ari haguhi kuuza.

⁶ Mutige kwiitiimaata kwe ekigiro kyokyoosi, nawe kumang'ana goosi, kwo okusabha no okwiisasaama, hamwe no okubhuga,

“Ozomirye,” obhweendi bhweetu bhumenyekane na Taatabhugya.

⁷ Ambe, omureembe guno gukurwa ku Taatabhugya, guno gukuhita obhumenyi bhwoosi bhwa abhaatu, bhuriibhe eziikoro na amiiseego geenyu, kwo okugwaatana na Krisito Yeesu.

⁸ Mubhuteero, abhahiiri bhaane, amang’ana go obhuheene, amang’ana gano gakweenderwa kusuukwa, amang’ana ge eheene, amang’ana gano gakyaari okwiisaanginia no obhubhi, amang’ana gano gakuzomera, amang’ana amazomu, amang’ana gano gakweenderwa okukumibhwa, mugiiseege amang’ana gayo.

⁹ Mugeenderere kukora gano mweegiri no okusuung’aana okurwa kweenye, gano mukiiywa nibhugiri, kweeki mukarora nigakoriri. Niho, Taatabhugya wuno akubhaha omureembe arageenderera kubha hamwe neemwe.

Pauro arabhabhuurira Abhafiripi “Ozomirye”

¹⁰ Nizomereerwe bhukong’u kwo okugwaatana no Omukuru Yeesu, kwo okubha mubhuteero, mutaangiri kweeki okuniiseegera enye. Nimenyiri kubha eziisiku zyoosi mwaari muraniseegera, nawe mutamirwe enzira yo okutumania obhusakirya bhweenyu kweenye.

¹¹ Nitakugaambeego kwe ekigirirye nino obhweendi, zeyi. Enye niegiri okwiiswa mwiibhaga ryoryoosi.

¹² Kweego nimenyiri okusuuhirwa ebhigiro, kweeki nimenyiri okubhona ebhigiro bhyaaru. Nimenyiri okwiiswa kwiibhaga ryo okubha ne

ebhyaakurya bhyaaru kasi rye enzara, eraabhe eriibhaga ryo obhuniibhi kasi ryo okusuuhirwa.

¹³ Niranagya kukora goosi gayo, kwo okubha Krisito niwe akuuniha amanaga.

¹⁴ Naabhe ego, mukakora bhuzomu okugwaatana neenye munyaako yino niari nayo.

¹⁵ Kyeego mumenyiri emwe Abhafripi, hano nataangiri okubharwaazira Amang'ana Amazomu, na hano narwiiri mukyaaro kyeenyu kya Makedonia, emwe abheene niimwe mwaari muranisakirya. Ekanisa yeenyu eyeene niyo yaari no obhugwaatani neenye kwo okuruusya no okusuung'aana ebhigiro.

¹⁶ Naabhe hano niari mumugye gwa Tesaronike, muhaanitungira enye ebhigiro bhyo okunisakirya.

¹⁷ Nitakugaambeego kwo okubha ndeenda okusuung'aana ebhigiro okurwa kweemwe, zeyi. Nawe niseegiri nirore orubhaango runo Taatabhugya araabhahe kutuukana no obhusaambaaruku bhweenyu.

¹⁸ Bhoono, ebhigiro bhira bhyoosi bhino mukamuha Epafurodito okunireetera, nibhisuung'aaniri. Bhiisiri mubhweendi bhwaane bhwoosi, kweeki ni kukiraho kyaabhurya niari kweenda. Obhusakirya bhuyo bhubheeri kyeego ekimweeso kino kikuraangasira bhuzomu, ekimweeso kino kiikiririibhwe no okumuzomera Taatabhugya.

¹⁹ Ambe, Taatabhugya waane arabhaha obhweendi bhweenyu bhwoosi kuriing'aana no obhuniibhi bhwaaye obhukuru. Arakora ego kwe enzira ya Krisito Yeesu.

²⁰ Taatabhugya Taata weetu, aguungibhwe kirakeego na kirakeego. Gabhe ego.

Amang'ana go obhuteero

²¹ Mubhakeerye abhahoreeru bhoosi bha Firipi kwo okugwaatana na Krisito Yeesu. Abhiikirirya abharikyaane bhano bhari hamwe neenye bharabhakeerya emwe.

²² Kweeki, abhahoreeru bhoosi bhano bhakwiikara mumugye guyo bharabhakeerya, kiindi bhano bhakukora emirimo munyumba ya Kaisari.*

²³ Orubhaango rwo Omukuru weetu Yeesu Krisito, rubhe hamwe neemwe. Gabhe ego!

* **4:22 Kaisari** gwaari ni mweeya gwo omutemi omukuru gwa Abharooma. Yaari arakaangata ebhyaaro bhyaaru kwe enzira yo obhukorooni, naabhe ekyaaro kya Iziraeri. Rora eng'ana yino mu Bhugaruri bhwa Amang'ana Amakong'u.

Eriiragano Eriihya
The New Testament in the Zanaki language of
Tanzania: Eriiragano Eriihya

copyright © Wycliffe Bible Translators, Inc.

Language: (Zanaki)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

PDF generated using Haiola and XeLaTeX on 11 Mar 2026 from source files dated 13 May 2025

59cdaa0a-a2d1-5bd9-b56f-be1ffc1ff2aa